

“Apeiron” i Specijalna olimpijada BiH organizovali Dane inkluzivnog sporta

DJECA SA UMANJENIM SPOSOBNOSTIMA ZASLUŽUJU ISTO MJESTO KAO I OSTALI

Panevropski univerzitet “Apeiron” Banja Luka i Specijalna olimpijada Bosne i Hercegovine 5. juna organizovali su sportsku manifestaciju “Dani inkluzivnog sporta na Apeironu”.

Na inkluzivnom takmičenju u košarci, fudbalu, stonom tenisu učestvovali su učenici JU Centar “Sunce” Prijedor, Zavod Bakovići, Zavod Drin, Sportski savez Mostara, Medicinski fakultet Tuzla, kao i učenici SŠC „Gemit-Apeiron“ i studenti Fakulteta sportskih i zdravstvenih nauka Univerziteta „Apeiron“. Obavljena su i antropometrijska mjerenja i testiranje motoričkih sposobnosti učesnika. Pored ovih takmičarskih aktivnosti, u programu „Mladi sportaši“ organizovani su treninzi za djecu obdanista „Marija Mažar“, gdje su djeca pokazivala svoje vještine, savladavajući različite vježbe koordinacije, brizne, snalažljivosti, skokova itd.

Volontersku podršku dali su studenti, nastavnici i saradnici Univerziteta „Apeiron“, a događaju je 4. juna prethodio seminar „Sportski trening osoba sa invaliditetom“, kao edukacija direktnih učesnika – trenera u sportu osoba sa posebnim potrebama.

„Nastojali smo ukazati i na neophodnost edukacije stručnih kadrova za rad sa osobama sa invaliditetom. Naši studenti su danas bili volonteri, i na taj način stiču neophodno iskustvo da nakon studija hrabro preuzmu zvanje profesora fizičkog vaspitanja“, rekla je doc. dr kada Delić Selimović, nastavnik na Fakultetu sportskih nauka i direktor Specijalne olimpijade BiH.

Prof. dr Velibor Srdić, dekan Fakulteta sportskih nauka naglasio je da je cilj manifestacije aktivnije i šire uključivanje društvene, naučne i stručne javnosti u poboljšanje kvaliteta života osoba sa posebnim potrebama.

Mališani iz Javne ustanove Sunce iz Prijedora Martina, Srđan i Denis, nisu krili oduševljenje što su imali priliku učestvovati, takmičiti se i družiti. *„Igram se i srećan sam što sam ovdje. Bio sam i prošle godine na istom ovom događaju, uživao sa svojim starim i novim drugarima“,* kazao je osmogodišnji Denis.

Dan inkluzivnog sporta rezultat je uspješne realizacije projekta Specijalne olimpijade BiH, Fakulteta sportskih nauka Panevropskog univerziteta “Apeiron” Banja Luka i UNICEF-a.

„Djeca sa umanjenim sposobnostima u sportskim aktivnostima mogu da učestvuju ravnopravno i imaju isto mjesto u društvu kao i ostali. Svrha nije bila pokazati ko je bolji, a ko lošiji, već omogućiti omladini da pokažu svoja dostignuća“, rekao je prof. dr Osmo Bajrić, prodekan Fakulteta sportskih nauka.

Organizatori su istakli da je primarno da se za djecu i omladinu sa posebnim potrebama obezbijedi prostor za prezentaciju dostignuća i omogući njihovo aktivno učešće u svim sportskim granama.

Banja Luka, 05. jun 2018. godina

Služba za odnose sa javnošću